



雲仙雜記卷之五

筆描窻竹影

宗測樂閑靜好松竹嘗見日篩竹影上窻以筆

備描之

常新錄

糖蜜莫逆交

陳昉得蜀糖輒以蜜澆之曰與蜜本莫逆交傳

芳略記

風月常新印宮人臂

明皇開元初宮人被進御者日印選以綢繆記
印于臂上文曰風月常新印畢漬以桂紅膏則

水洗色不退 史諱錄

念金輪呪

敲兩耳鐺眼挂心丸念金輪呪則所思之人不以存沒是夜必夢見之 事略

水晶環渡舟

蕭整嘗登陸渾沙洲忽水漲不得下急呼村童折塵尾水晶環与之渡舟而過 三賢典故

鳴牙餅

許康年謁劉遜贈遜鳴牙餅千枚曰雖微物也助厨中兩日之費 退耕傳

棠棣之好

李初直遇與人相知則曰棠棣之好何以過此喜慶倍常 叙聞錄

金蘭簿

戴弘正每得密友一人則書于編簡焚香告祖考號為金蘭簿 宣武盛事

鴨卵成花

向聲能於鐺中以手撥鴨卵成花 河中記

燭圍

韋涉家宴使每婢執一燭四面行立人呼為燭

圍 長安後記

宴客典斟

陳無咎宴客一客用一婢典斟必十二斟而後使滿以盡誠敬之道 洛都要記

金牌盈座

河間王夜飲妓女謳歌一曲下一金牌席終金牌盈座 豐盈傳

聚香團

揚州太守仲端畏妻不敢延客謝廷皓謁之坐久饑甚端入內袖聚香團啗之 揚州事述

待闕駕鸞社

朱子春未婚先開房室帷帳甚麗以待其事旁人謂之待闕駕鸞社 救樓記

笑春紅

閩州參軍黃涉婢曰咲春紅死涉念之淚洒犀簾至皆損壞 蜀普錄

二花

阮文姬挿髮用杏花陶溥公呼曰二花 河東備錄

三鹿郡公

袁利見為性頑獷方常謂表生已封三鹿郡公
蓋譏其太麤疎也 幽燕記

崑崙玉盞

宇文卓方執崑崙玉盞聽左丞檀超高談不覺
墜地 青州雜記

坐間牡丹花

宋旻語常帶華藻李孺安曰時方三月坐間生
無數牡丹花矣 鄴郡名錄

杜鵑喚歸

石誼未娶聞杜鵑喚歸歎曰此物催人使歸使

我何所歸耶 金臺錄

遇河神

顧希微開成二年遇河神屈莫多曰更二千年
大江所在堤岸當崩沙九里 禹功記

口吻生花

張祐苦吟妻孥喚之不應以責祐祐曰吾方口
吻生花豈恤汝輩 白氏金鎖

贈詩勝爛黃魚

皇甫彙謁韓愈愈贈以詩彙退有言怒愈不為
置酒愈曰豈不勝以爛黃魚待汝耶 續鍾鼎句

折筋不休

山濤酒後哺啜折筋不休 酒中玄

防風術

白居易在翰林賜防風粥一甌別取防風得五合餘食之口香七日 金鑿密記

食蠮蟪

鹿宜孫食蠮蟪於壽陽甕中頓進數器 止戈集

羣公對雪

羣公對雪尚隆之曰麪堆金井誰調湯餅吳永素曰玉滿天山難刻珮環坐間服其韵精 姑臧記

屋瓦皆鏤

余宗伯屋瓦皆鏤竅穴千百雨則散如真珠用陳留瓦則堅而易鏤 三堂往事

三年不見羊角

皮蕃去北而復來鄱陽食竹笋曰三年不見羊角衰矣 叩頭錄

採星盆

秘昌蓄採星盆夏月漬果則倍冷叙聞錄

作剪刀

姑園鐵作剪刀以首帶根粉養之裁衣則盡成
墨界不用人手而自行檢着集

左撚巾拭面

陽華用左撚巾拭面倍有光彩自慶傳

碑石

李輔國葬父碑石用豆腐一千團磨瑩如紫玉
碑字四面鐫葵花三百朵晉公遺語

漬紙

以竹梢甘露和天南星漬紙一宿裁之刀去如

飛文房寶飾

除夜歎老

裴度除夜歎老迨曉不寐爐中商陸火凡數添
也金門歲節

印普賢象

玄裝以回鋒紙印普賢象施于四衆每歲五馱
無餘僧園逸錄

三辰酒

玄宗置麴精潭砌以銀軌泥以石粉貯三辰酒

一萬車以賜當制學士等史諱錄

桑木根可作沉香想

裴休得桑木根曰若作沉香想之更無異相雖對沉水香反作桑根想終不聞香氣諸相從心起也常新錄

皂蓋能與日輪爭功

韓愈刺潮州嘗暑中出張皂蓋歸而喜曰此物能與日輪爭功豈細事耶傳芳略記

雷門四老石

王維輞川林下坐用雷門四老石燈滅則石中

鑽火事略

握麥芒刁字

牛僧孺進士時常握麥芒刁字有繆誤隨手刪割點定三賢典略

麒麟草

元和時館閣湯飲待學士者煎麒麟草鳳翔退耕傳

魚藻洞

魚朝恩有洞房四壁夾安瑠璃板中貯江水及萍藻諸色蝦虢魚藻洞南康記

鼻出黃膠

賀知章忽鼻出黃膠

容錄

晉者謂飲酒之過從

數米而食

沈休文羸劣多病日數米而食羹不過一筋青

陽記

廬墓日影為之不移

鄧寅廬墓墳土未乾日影為之不移壠上記

飼牛以天麻飯

青齊間遇春耕則飼牛以天麻飯仍用錦縷繫

于角上

耕桑偶記

高麗絲結

張均妓多麗禪琵琶曲頂上有高麗絲結趙詩

爭奪致傷二指弄音集

元夜食牛肺犯天樞使

梁鄴上元後忽髮變如血卜曰元夜食牛肺犯

天樞巡使夜行禱謝可免影燈記

菖蒲成獅子鸞鳳狀

僧普寂大好菖蒲房中以菖蒲種成獅子鸞鳳

仙人之狀海墨微言

鴨肝猪肚

王縉飲酒非鴨肝猪肚筋輒不舉 醉仙圖記

吞花卧酒

虞松方春以謂握月擔風且留後日吞花卧酒
不可過時 曲江春宴錄

遮椿不染風

盧携夢人贈句曰若問登庸日遮椿不染風初
不解其言後數年携拜相遮下古椿一株雖狂
風驟雨不濕不搖 鳳池編

屋竅如七星

鄭廣文屋室破漏自下望之竅如七星 遙原記

日用斗麪為糊以供緘封

順宗時劉禹錫干預大樞門吏接書尺日數千
禹錫一一報謝綠珠盆中日用麪一斗為糊以
供緘封 宣武盛事

麪如棗核而中空

楊埏游王鉷家食一物如棗核而中空其實麪
也埏詢其法鉷笑而不言 河中記

雲仙雜記卷之五

雲仙雜記卷之六

讀書數真珠以記

于授幼時家以綠真珠勝為簾押授讀書數真珠以記日輒一遍長安後記

竹粉湯

夏侯鉞謁盧懷慎坐終日得竹粉湯一盃洛都要紀

蜀中厚朴

蜀中厚朴若酒後來之紫色蕩散用輒無力窮幽記

碎錦坊

晉公午橋莊有文杏百株其處立碎錦坊曹林
異景

百年歌

李觀作百年歌王湜請其法觀向湜彈指曰遺
子爪甲清塵庶幾文思有加詩源指訣

夢青龍吐棊經

王積薪夢青龍吐棊經九部授已其藝頓精出
棊訣

白眼蜂

蠶退之後多為乾腊貨之開元中春末兩市多
白眼蜂如山市人以此卜絲帛之豐歉豐寧傳

安石榴

李漢碎胡瑪瑙盤盛送王莒曰安石榴莒見之
不疑既食乃覺揚州事述

嗜鴨腊

彭几嗜鴨腊未曝前三日置鎮石之下時所共
服蜀音錄

壬癸席

申王謂猪既供滄不宜處於穢處乃以氈龕粟

粥待之取其毛刷淨令巧工織壬癸席滑而且
涼河東備錄

歛諸妓釵鈿以記意

金城多美妓賀蘭劍曰吾既臨人私情難展遇
宴飲則歛奪諸妓釵鈿退以記意金城記

沈秘景符

禹導河之際沈秘景符以鎮五千之水患後人
賴焉禹功記

沙上玩味成詩

柳宗元吟春水如藍詩久之不成乃取九脚床

於池邊沙上玩味終日僅能成篇白氏金鎖

吟詩落齒

謝靈運半日吟詩百篇頓落十二齒續鐘嶸句

眼

綠牝鞍

處士富麟翁從縣令蒞通源游蘭居寺通源給
以綠牝鞍幽燕記異

鳳眼

龍道千卜室于積玉坊編藤作鳳眼窻支床用
薜荔千年根炊飯洒沈水香浸酒取山鳳髓青

巨栗殼為盃

鄴中產巨栗脫其殼可以為盃 鄴郡名錄

眉分九聚

朱泚眉分九聚相者告以大貴泚信之 金臺錄

洞天餅

獮國夫人就屋梁上懸麻腸於半室筵宴則使人從屋上注酒於腸中結其端飲則解開注于盃中號洞天聖酒將軍又曰洞天餅 酒中玄

賜成象殿茶果

金鸞故例翰林當直學士春晚困則日賜成象殿茶果 金鑿密記

冰雪至夏價等金壁

長安冰雪至夏月則價等金壁白少傅詩名動於閭閻每需冰雪論筐取之不復償價日々如是 止戈集

蛙臺

桂林風俗日日食蛙有來中朝為御史者朝士戲之曰汝之居非烏臺乃蛙臺也御史荅曰此非蛙名圭虫而已然較圭虫之奉養豈不勝於

黑面即貳黑面即謂猪也朝士大赧而退承平
舊纂

棄官求道

丁繫自尚書郎參靈度禪師棄官修道日食脫粟二升諸僧鉢水一盃夏月夜禪雖飛蚊啣食終不搖動坐夏既滿面為破爛舊相禪學錄

携琴就松風澗響之間

段由夫携琴就松風澗響之間曰三者皆自然之聲正合類聚羊曇節以金縷羊要之曲終不去金微變化篇

出遊必携圍碁短具

王積薪每出遊必携圍碁短具畫紙為局與碁子并盛竹筒中繫于車轆馬鬣間道上雖遇匹夫亦與對手勝則徵餅餌牛酒取飽而去碁天洞覽

墨難減者萬金不換

凡墨日用之一歲磨減半寸者萬金不換然至難得成老相墨經

收茶三等

覺林院志崇收茶三等待客以鷲雷莢自奉以

萱草帶供佛以紫茸香蓋最上以供佛而最下以自奉也客赴茶者皆以油囊盛餘瀝以歸蠻

笏囊笏架

會昌以來宰相朝則有笏架入禁中逐門傳送至殿前朝罷則置於架上百寮則各有笏囊親吏持之

常朝錄

徐峰善碁

徐峰善碁段成式歆盡窮其術峰曰子若以墨後猊與我當使子過我十倍

大唐龍髓記

瞬碧侯

琴莊有溶溶軒軒前皆池地也度池得回筇磴上自在峰藺先生日往峰上採蕨蕨生九股以釀醋異常守臣取進之封峰曰瞬碧侯

出琴莊

美事

錢龍宴

洛陽人有妓樂者三月三日結錢為龍為簾作錢龍宴四圍則撒真珠厚盈數寸以斑螺令妓女酌之仍各具數得雙者為吉妓乃作雙珠宴以勞主人又各令作餽緩帶以一丸餽舒之可

長三尺者賞金菱角不能者罰酒瓶樓記

王武子好馬

王武子好馬非馬不行正旦則柳葉金障泥上元則滿月韉清明則剪水鞭重午則龍嬌鞍八月中秋則玉櫛揔絡頭重陽則蟬兒鞞春秋社則塗金鞍冬至則嘶風鞞除日則藥王鞍每節日則餵馬以明紗豆薔薇草馬癖記

鸞手校尉

錢鏐鎮吳越尊賢渴士使名畫工二三十人在松江號鸞手校尉向北方士子流移來者咸寫

貌以聞擇清俊福厚者用之胡岳方渡江画工以貌奏鏐見之歎曰面有銀光奇士也即時召見方鎮編年

剪刀麪月兒羹

柳公權以隔風紗作龍城記及入朝名品號錦樣書以進上方御剪刀麪月兒羹即命分賜出字錦

玄祿

老子始生其母名之曰玄祿集真記

大雅之文

柳宗元得韓愈所寄詩先以薔薇露灌手薰玉
蕤香後數讀曰大雅之文正當如是好事集

二儀餅

開元中長安物價大減西市賣二儀餅一錢數
對胡莢多十金一桿豐年錄

槐膠彈子

李少微子女頗多每朝退於亭榭散槐膠彈子
數百枚令諸小兒爭取之以為戲笑終日不倦
戲已復收于篋放懷集

酒神

酒席之士九吐而不減其量者為酒神醉錄

九芒珠

王武子以九芒珠穿為紉索編華架用之每月
洗以鯉魚涎摺拾菁華

石綠鏡臺

張燕公有石綠鏡臺得自明川道士玄宗聞其
有異取以精嗽十車燒之不變乃已類聚記

自課庵

金子栖每為文則入自課庵一文必三草及十
年之後悟其淺近必盡付於火生平凡三焚文

集 徵文玉井

淵明拜火

陶淵明日用銅鉢煮粥為二食具遇發火則再拜曰非有是火何以充腹 淵明別傳

筆封九錫

薛稷為筆封九錫拜墨曹都統黑水郡王兼毛州刺史 龍鬚志

墨封九錫

稷又為墨封九錫拜松燕督護玄香太守兼亳州諸郡平章事是日墨吐異氣結成樓臺狀鄰

里來觀食久乃滅 纂異記

紙封九錫

稷又為紙封九錫拜楮國公白州刺史統領萬字軍界道中即將 事略

硯封九錫

稷又為硯封九錫拜離石鄉侯使持節即墨軍事長史兼鐵面尚書 鳳翔退耕傳

為花樹洗瘡止痛

郭文在山間有石榴楊梅等花為樵牧所傷始甚賣簪沽酒以洗花樹人問之曰為二子洗瘡

止痛 芳賢傳

雲仙雜記卷之六

雲仙雜記卷之七

元白兩不相下

元微之白樂天兩不相下一日同詠李花微之
先成曰葦綃開萬朵樂天乃服綃練也葦白而
綃輕 高隱外書

仙人栢葉書

郭天民巧思橫生能摺書簡反覆如栢葉狀鄉
人謂之仙人栢葉書 安成記

家庖百品

張元厚家庖百品日日不變有蔡機缸二千盛

貯皆滿 梁福廬陵記

硯中出白影珠

侯道昌因雨置龜頭硯於簷下承溜以滌之俄而滴破硯中出白影珠十顆有患目者煮珠水洗之皆愈 馮正雲金谿記

陳蕃待客

陳蕃待客拌飯以鹿脯芼羹以牛脯未嘗別為異饌 董慎績豫章記

桂人好食蝦蟆

桂人好食蝦蟆仍重乾菌為糝赴食者至以餘

俎包歸遺兒女雖汚衫不耻

張洞林桂林志

霜露能染紅紫

鵝管山霜可染紫白庶潭露能染紅為天下冠恨人無知者 常奉真相潭記

蒲桃髻

小兒髮初生為小髻十數其父母為兒女相勝之辭曰蒲桃髻十穗勝五穗 李明之衡山記

方囊盛金錢

富人賈三折夜以方囊盛金錢於腰間微行市中買酒呼秦聲女置宴 方德遠金陵記

千眼仙人赴東林寺

廬山遠法師命畫之日山中峰澗寺落皆見千眼仙人成隊執幡幢香花赴東林寺法師死乃止
十三賢共注廬山記

洛如花

吳興山中有一樹類竹而有實似莢狀鄉人見之以問陸澄澄曰名洛如花都有文士則生

張寶就印錄

虱念阿房宮賦

揚州蘓隱夜卧聞被下有數人齊念阿房宮賦

聲繁而小急開被視之無他物惟得虱十餘其

大如豆殺之即止
清異志

甲乙膏

蜀人二月好以致雜黃牛肉為甲乙膏非尊親厚知不得而預其家小兒三年一享
浣花旅地志

魚脊出金釵

寶曆中酉陽人見釣魚師有魚腦貫黃文愛而買歸食至脊上出金釵一隻長六寸
唐餘錄

團沙捏成睡嵇康

房瑄少時曾至洲渚上團沙捏成睡嵒康甚有標態見者多愛之童子通神錄

樂音泉

強村有水方寸許人欲取之唱浪淘沙一曲即得一盃味甘冷村人因名曰樂音泉玄山記

石斧欲斫斷詩手

杜甫子宗武以詩示阮兵曹兵曹答以石斧一具隨使并詩還之宗武曰斧父斤也兵曹使我呈父加斤削也俄而阮聞之曰誤矣欲子斫斷其手此手若存天下詩名又在杜家矣出文覽

清水郎君

司馬伯姝買得鴨卵一枚非常珍重夜猶未食夢曰此卵乃徐龍幼子清水郎君也不殺將富姝乃放之三峰集

徐鳳儀杖

徐鳳儀有一杖直如筆管其後每年生一節二十年每年縮一節三月則杖之四面青赤白黑各開一花不知何木也陶家餅餘事

劍生神芝則天下晏清

成都朱善存家世寶一劍每生神芝則天下晏

清如安史黃巢之亂劍皆吐黑烟屬天不差毫厘

王塵集

聚芳圖百花帶

宗測春遊山谷見奇花異草則係于帶上歸而圖其形狀名聚芳圖百花帶人多效之

高士春

李花如飛

伍貫卿居沅陵家有李花一株月夜奴婢遙見花作數團如飛仙狀上天去花上露水條然作雨數千點花則亡矣

樞要錄

起藁窻上

江總為文次至吟詠得意則起藁於窻上不堪示則投置溷中久而文遂工矣

文筆襟喉

蜜浸烏梅解宿醒

陳永陽王宿醒未解則為蜜浸烏梅每啖不下二十枚清醒乃已

樵人直說

榕粉

小兒瘡痂以榕粉日傅之則易瘥而無痕

出汗

湯錄

灰山

無棣有灰山山南有石竅其中二麥無數取之不極三賢典略

嗜蛤蜊

吐突承璀嗜蛤蜊炙以鐵絲床數澆鹿角糝然後食傳芳略記

譚衣

穆宗以玄絹白書素紗墨書為衣服賜承幸宮人皆淦鄙之詞時號譚衣至廣明中猶有存者史諱錄

三樣錢買二色酒

西門季玄造二色酒白酒中有黑花斟於器中花亦不散其中有肝石故也崔道旅以金銀銅錢來酤曰以我三樣錢買君二色酒欲辭得乎常新錄

大筍中有眼睛

裴晉公於藍田得一大筍破之有三四眼睛而香美過甚乃與魯序分食之晉公遺語

兩點螺磨紙

治紙之昏而不染墨者用兩點螺磨紙左右三千下其病去矣文房寶飾

沈休文多病

沈休文多病六月猶綿帽温爐食薑椒飯不爾
則委頓自慶集

盲郭璞

路巖幼病有人稱善醫禳之術巖用之不效歎
曰此盲郭璞也搔首集

淨眼僧

傳法寺淨眼僧能用藥煮烏頭施人治百疾皆
驗又以穢跡呪治疔破鐵城偈除鬼祟數無不
捷僧園逸錄

竹節中神水

重午日午時有雨則急斫一竿竹竹節中必有
神水瀝取和獺肝為圓治心腹塊聚等病出金
門歲節

釀換骨醪

憲宗采鳳李花釀換骨醪晉國公卒淮西回黃
杷金餅賜二斗叙聞錄

畏薯藥

李輔國大畏薯藥或人因以示之必眼中火出
毛髮皆瀝血因致大病叩頭錄

分香蓮

三堂使宅有鈎仙池一種蓮子一歲再結實子
十隻其花時香兼桃梅萸菊郡人傳分香蓮不
論錢 三堂往事

雪竹搔頭

趙綸妻死遺雪竹搔頭於堦下不數日化為楊
梅花朶如撒時人異之 姑臧前後記

思茶聖

卞子京遇茶仙束帶拜金鑄紫堂仙仍坐於席
上勝克之利萬不失一 手參茶訣

焚杜甫詩飲以膏蜜

張籍取杜甫詩一帙焚取灰燼副以膏蜜頻飲
之曰令吾肝腸從此改易 詩源指訣

藏盤筵於水底

白氏履道里宅有池水可泛舟樂天每命賓客
繞舡以百十油囊懸酒炙沉水中隨舡而行一
物盡則左右又進之藏盤筵於水底也 窮幽記

七井生涼

霍仙鳴別墅在龍門一室之中開七井皆以雕
鏤木盤覆之夏月坐其上七井生涼不知暑氣

雲仙雜記卷之七

雲仙雜記卷之八

八角玉升

宣帝時西夷恒陁國貢八角玉升夏以水澆之則無暑冬以火迫之無寒異事甚衆逢夏記

失去周字知唐必興

則天初稱周方具告天冊文有吏人見大周字上有兩仙童長二三寸執刀剡削斯須視之失去周字人知唐必復興鳳池編

曲江春游

曲江春游之家以脂粉作紅燄竿上成雙桃樹

夾雜畫帶前引車馬曲江春遊錄

毛詩卷染油代燭

倪芳飲後必有狂恠恬然不耻或以毛詩卷染油代燭醉遊徹曉醉仙圖記

肩睫間常化佛

清涼僧海豐苦行二十餘年人見其肩睫間常化佛千百大如黍米往來遊行已不覺也清涼僧海

好李花致富

終南及廬岳出好李花而市貴侯富民以千金

買種終廬有致富者耕桑偶記

一物如人眼睛

蕭餘上元夜於宣陽里酒盤下得一物如人眼睛其體類美石光彩射人餘夜遊市肆閑置掌中每行黑闇衢巷隨身光明三尺毫末可鑒後因而飛出影燈記

造笙

初造笙每管中入荻根細沙一豆許遇吹時飛沙於中激揚聲愈清徹近世樂工未有知者惜夫辨音集

喬敷嗜魚

喬敷嗜魚而貧日向漁人貸食漁人送魚一斤則以白堊標門記之後日償價年律一終白堊盈門墟上書

浮陽筍

九華小民浚池得物狀類竹根旁有一銘曰浮陽筍太古孕舉投牆在三年不盡民不識字使人讀之試以豆一斗造牆投物其中果三年不減時逢道士青陽記

瓜甲間皆出雲煙

魏郡開成中大旱徧禱山岳或言西沈陸先生道行精明請之必驗太守以下乃携杏酒青羊以備牲醪告于山中先生受禮訖對太守呼吸數過五指連拂之瓜甲間皆出雲烟之氣惟中指氣象甚盛先生曰郡中雨得之諸縣皆獲八分亦可小稔已而其說不誣從容錄

石魚

南康有狂人周可大見魚必置數十頭食餘棄于几上人謂隨即臭腐可大以手摩之皆為石魚後年餘友人訪之見其紙裹石魚煨以啖客

新香不異常魚

逍遙公南康記

王母惜黃中李過蟠桃

西王母居龍月城城中產黃中李花開則三影結實則九影花實上皆有黃中二字王母惜之過於蟠桃與紫陽真官博戲則以一二百枚遞分勝負

集真記

重黎盞酌水

宣武判官洪子昇延嵩山鍊師在宅值大雨階庭彌滿欲上堂戶子昇有憂色鍊師取懷中重黎盞酌水不滿盃而庭砌隨已乾矣

宣武盛事

時元亨鍊真

方山道人時元亨鍊真厭世三十餘年精唾涕淚俱惜之七十髮不白走如奔馬宋先生曰吾以小術令此子三日即死乃於酒中以羊豕腦一拌啖之元亨不覺也飲罷便苦頭痛下痢明日便出如剝淨鷄頭肉者二三升許又明日元亨果卒

河中記

孫逢年好酒色老不衰

長安孫逢年日一醉無虛席妓妾曳綺羅者二百餘人晚年衰憊齒皆腫齟空虛如樓閣而舊

好不衰 長安後記

王維居輞川地不容塵

王維居輞川宅宇既廣山林亦遠而性好溫潔地不容浮塵日有十數掃飾者使兩童專掌縛帚而有時不給洛都要記

磁石益眼

益眼者無如磁石以為盃枕可老而不昏寧王宮中多用 豐寧傳

魚喜鹿胎香

揚州太守間丘惠會僚友于轉沙亭集境內漁

戶令曰所得魚多者有金帛之賞有一漁人以肉物作塊散懸於網上取魚倍衆力凡十經得魚三千六百無甚小者衆慙而退太守詢之曰魚喜鹿胎之香適散懸者乃此物也下網名之萬魚畢聚矣 揚州事述

降魔寺僧以名召魚

東川降魔寺僧吉祥魁梧多力受飯五鉢日夜誦經九函池中魚知其數以名召之背出水面使去即沒 蜀普錄

并代人喜嗜麪

并代人喜嗜麩切以吳刀淘以洛酒添斗貯之
擊鼓集老幼自以多寡取之至飽

河東備錄

鶴識字

衛濟川養六鶴日以粥飲啖之三年識字濟川
檢書皆使鶴銜取之無差

金城記

洗心糖

茅地經冬燒去枝梗至春取土中餘根白如玉
者搗汁煎之至甘可為洗心糖

燕異記

槐花絲

青齊間有一種苑花盛開時垂絲至二三尺採

之練以松脂遮相纏結織成鞋履寄往都下人
皆不辨何物

青州雜記

秘密泉

甘塘社有一水方丈瑩潔春夏不竭旱則禱之
應時雨下然牛馬猪羊飲之肥澤鷄鴨鵝鴈飲
之必死鄉民緣可以救旱號秘密泉

鄆郡名錄

怯夜幡

胡陽白壇寺幡刹日中有影月中無影不知何
故因號怯夜幡

金臺記

魚鼈隨世安危

大禹治水功成令江淮河海神曰魚鼈衰盛隨世安危自此之後年必小減使其價遞增以食晚未之民應天意也禹功記

書冊以竹漆為糊

凡書冊以竹漆為糊逐葉微攤之不惟可以久存字畫兼紙不生毛百年如新此宮中法也白氏金鎖

真脫絲布

人之為文語意踈慢者真脫絲布文士之病莫大乎此鍾嶸句眼

入酒中沐浴使毛髮識味

石裕方明造酒數斛忽解衣入其中恣沐浴而出告子弟曰吾平生飲酒恨毛髮未識其味今曰聊以設之庶無厚薄酒中玄

龍口渠

翰林有龍口渠通內苑大雨之後必飄諸花蕊經由而出有百種香色名不可盡春月尤妙金鑿密記

口中現五色牙齒

孔斂好術藝迎接方士多所傳授能口中現五

色牙齒彩色光絢一瞬即改止戈集

李有九標

蕭瑀陳叔達於龍昌寺看李花相與

香雅細淡潔密宜月夜宜綠髻宜白酒

承平舊纂

斗盆燒乳頭香

曹務光見趙州以斗盆燒乳頭香十斤曰財易

得佛難求舊相禪學錄

鼠精李

王侍中家堂前有鼠從地出其穴即生李樹花

實俱好此鼠精李也好事集

猪肝中有識書

白浦民割猪肝肝中有一紙大如手色如新書

云煙 蒼蒼明年無粮次年巢寇趙州都多荒

纂異記

酒魔

常元載不飲羣僚百種強之辭以鼻聞酒氣已

醉其中一人謂可用術治之即取針挑元載鼻

尖出一青虫如小蛇曰此酒魔也聞酒即畏之

去此何患元載是日已飲一斗五日倍是玄山

記
糠市

洛陽振德坊皆貧民例享糟糠之薄賀知章目
為糠市 從容錄

品物互徵古事

房璘至人家凡閱四筵摘其品物互徵古事一
一切當河中記

雲仙雜記卷之八

雲仙雜記卷之九

一杯羹三萬錢

李德裕奢侈每食一杯羹其費約錢三萬雜珠
玉寶貝雄黃朱砂煎汁為之過三煎即棄其滓
博異志

縑繫南山樹

明皇問富人王元寶家財多少對曰請以一縑
繫陛下南山樹南山樹盡臣縑未窮 博異志

心織筆耕

翰林盛事云王勃所至請託為文金帛豐積人

謂心織筆耕北里志

燕奴

有術士於腕間出彈子二丸皆五色叱令變化即化雙燕飛騰名燕奴又令變即化二小劍交擊湏臾復為丸入腕中洞微志

三斗爛腸

殷洪遠云周旦腹中有三斗爛腸金樓子

金菜玉蔬

始皇遣徐福入海求金菜玉蔬并一寸椹

無腸公子

蟹曰無腸公子龜曰先知君

駭雞犀

通天犀中有白紋如絲者置米其上以飼雞雞見驚走名駭雞犀刻為魚形持入水水輒開出抱朴子

天鼓

雷曰天鼓雷神曰雷公抱朴子

虎狼稱呼五君

山中寅曰稱虞吏者虎也稱當路君者狼也稱東王父者麋也西王母者鹿也成陽公者狐也

社君者鼠也 抱朴子

鵲巢獺穴

鵲巢知風之所起獺穴知水之高下暉日知晏
鳩鳥也陰諧知雨 雉也出淮南子

靈運鬚

謝靈運美鬚臨刑施南海祇洹寺為維摩詰鬚
寺中寶惜中宗時安樂公主五日闔百草遣人
取之仍剪棄其餘 國史纂異

沒了期

錢鏐封吳越王工役大興士卒嗟怨或夜書府

門曰沒了期沒了期修城繞了又開池鏐出見
之命吏書曰沒了期沒了期春衣繞了又冬衣
嗟怨頓息 五代史補

拔釘錢

趙在禮在宋州所為不法百姓苦之一日制下
移鎮永興百姓相賀曰眼中拔却釘矣可不快
哉在禮聞之上表乞還鎮朝廷許之在禮每口
率錢一千號拔釘錢遂獲百萬 同上

釜中龍

南唐時有蒼頭持龍水圖來貨或得之將練為

衣忽釜中雲蒸起見二龍騰躍穿壁而去

黃紙寫勅

正觀中太宗詔用麻紙寫勅詔高宗以白紙多
虫蛀尚書省頒下州縣並用黃紙

食玉炊桂

蘓秦之楚三日乃得見王辭行王曰魯不少留
對曰楚國食貴於玉薪貴於桂謁者難得見如
鬼王難得見 天帝臣食玉炊桂因鬼見帝王
曰聞命矣 戰國策

鵲蚌

趙旦伐燕蘓代為燕謂惠王曰臣過易水蚌方
出曝而鵲啄其肉蚌合而緝其啄鵲曰今日不
雨明日不雨即有死蚌蚌曰今日不出明日不
出必有死鵲雨不相舍漁者得而并之 同上

釐婦

魯人有獨處室者隣之釐婦 寘嬪也 亦獨處夜
暴風雨釐婦室壞趨而託焉魯人閉戶曰男女
不六十不閑居今子幼吾亦幼是以不敢納婦
曰何不學柳下惠然嫗不逮門之女魯人曰下
惠則可吾固不可吾將以吾之不可學下惠之

可 孔子家語

螳螂搏輪

齊莊公出獵有螳螂舉足將搏其輪御曰此蟲知進而不知退不量力而輕就敵莊公曰以為人必為天下勇士矣於是迴車而避之而勇士歸之同上

銅鶴樽

韓王元嘉有一銅鶴樽背上注酒則一足倚滿則正不滿則傾側朝野僉載
鵲尾杓

陳思王有鵲尾杓柄長而直置之酒樽凡王欲勸飲者呼之則尾指其人同上

麒麟楨

唐楊炯每呼朝士為麒麟楨或問之曰今假弄麒麟者必脩飾其形覆之驢上宛然異物及其其皮還是驢耳無德而朱紫何以異是同上

喙長三尺手重五斤

陸餘慶為洛州長史善論事而繆於決判時嘲之曰說事即喙長三尺判事則手重五斤同上

鶴鳴鷄樹

鳳閣侍郎杜景儉文章知識並高遠時號鶴鳴
雞樹朝野簽載

鳩集鳳池

王及善才行庸猥為內史號鳩集鳳池出朝野
簽載

金剛舞夜叉歌

隋諸葛昂高瓚爭為豪侈昂屈攢串長八赤餅
潤丈餘餒庶如柱酒行自作金剛舞以送之瓚
復屈昂以車行酒馬行肉確斬繪張蒜蘆自唱
夜叉歌以送之朝野簽載

金祀玉階

明光殿金玉珠璣為簾箔金祀玉階晝夜光明
在桂宮中三輔黃圖

傳座

長安風俗元日以後適飲食相邀號傳座南音
新書

寶苗

山中有葱下必有銀有薤下必有金有薑下必
有銅錫山中有王者木旁枝下垂謂之寶苗

築糠三尺

新羅人泛海漂隋鬼國鬼執之曰汝能与我築糠三尺乎汝欲鼻長一丈乎其人請築久不成乃為鬼拔其鼻如象酉陽雜俎

翻綽入水

玄宗嘗令左右提翻綽入池水中復出曰向見屈原笑臣爾遭逢聖明何亦至此同上

龍巢翻

夷陵江或浮大木蔽塞水面土人謂之龍巢翻北夢瑣言

見李思戒

明宗不豫馮道入問因指果實曰如食桃不康他日見李思戒北夢瑣言

一步一計

李克用入魏博覘之城上有旗幟來往晉王曰劉鄩一步一計更令審探果縛藟為人縛旗於上以驢負之循城而行鄩軍遁已二日矣同上

通神錢

張延賞判度支有獄頗冤濫公名吏嚴戒旬日須了明日案上有小帖子曰錢三萬貫乞不問此獄公怒更促之明日帖子云五萬貫公亦怒

明日復見帖子曰錢十萬貫遂止不問所親問
之公曰錢至十萬通神矣無不可為之事吾懼
及禍不得止也 出開鼓吹

九花虬

代宗時范陽貢馬額高九寸真虬龍也身被五
花紋號九花虬後以賜郭子儀 杜陽雜編

上清珠

開元初罽賓國王貢上清珠光照一室有仙人
玉女雲鶴搖動其中有水旱兵革之災虔視無
不應驗 同上

副急淚

宋世祖謂劉德願曰卿哭貴妃悲者當厚賞德
願應聲慟哭撫膺擗踊涕泗交流上甚悅故用
豫州刺史以賞之上又令醫術人羊志哭貴妃
志亦嗚咽極悲他日有問志者曰卿那得此副
急淚志曰我爾日自哭已妾耳 通鑑

五花館

荆南舊有五花館待賓之上地也故眩上成納
詩曰不是上台怜姓字五花賓館敢從容 南部

新書

烏龍

會稽人張然滯役經年不歸婦與奴私通然養一狗名曰烏龍後然歸奴懼事覺欲謀殺然狗注睛視奴奴方興手烏龍盪奴奴失刀仗然取刀殺奴 絕搜神記

鬚髯如戟

山陰公主淫恣悅褚彥回以白帝帝召彥回西上閣宿十日公主夜就之備見逼迫彥回整身而立從夕至曉略不移志公主謂曰君鬚髯如戟何無丈夫意彥回曰雖不敏何敢首為亂階

通鑑

田舍翁十斛麥

李勣入見上問之曰朕欲立武昭儀為后褚遂良固執以為不可遂良既顧命大臣事當且已乎對曰此陛下家事何必更問外人上意遂決許敬宗宣言於朝曰田舍翁多收十斛麥尚欲易婦况天子立后何豫諸人事而妄生議乎 同上

赤鳳凰

后所通宮奴燕赤鳳者雄捷能超樓閣兼通昭

儀十月五日宮中故事上靈女朝吹塤擊鼓連臂踏歌赤鳳凰來曲后曰赤鳳凰為誰來昭儀曰赤鳳為姊來寧為他人乎后怒以杯擲昭儀裙曰鼠子能噬人乎昭儀曰穿其裙見其私足矣安在噬人乎帝微聞其事以問昭儀昭儀曰以漢家火德故以帝為赤鳳帝信之大悅趙后外傳

雲仙雜記卷之九

雲仙雜記卷之十

蕤賓鐵

樂工廉郊師於曹緇綱曰教授人多矣未有此性靈弟子也郊常池上彈蕤賓調忽聞芰荷間有物跳躍出岬乃方響一片有知者識是蕤賓鐵也指撥精妙致律呂相應物類相感耳

琵琶錄

截鞞留鞭

姚崇牧荊州受代日闔境民泣撫馬首截鞞留鞭以表瞻戀

開元天寶遺事

蜂蝶慕香

都下名妓楚蓮者國香無及每山則蜂蝶相隨
慕其香 同上

自暖盃

內庫有青酒杯紋如亂絲其薄如紙以酒注之
溫溫然有氣相次如沸湯名自暖杯 同上

遊仙枕

龜茲國進一枕色如瑪瑙枕之則十洲三島四
海五湖盡入夢中帝名為遊仙枕 同上

辟寒犀

交趾國進犀一株以金盤置於殿中暖氣襲人

使者曰此辟寒犀也 同上

喚鐵

太白山居士郭休有運氣絕粒之術以繩繫一
鐵片子鳥獸聞之即集遠下名曰喚鐵 開元天寶遺事

冰山

進士張彖方學有大名楊國忠用事爭詣門彖
獨不往曰爾輩謂楊公之勢可倚如太山耶以
吾所見乃冰山也皎日一照則當悞人後登第
為華陰尉歎曰丈夫有凌雲蓋世之志拘於下
位若立身於矮屋中使人擡頭不得遂拂衣長

往 同上

花相

學士許慎與親友宴花園中聚花鋪座曰吾自有花相何消坐具 同上

風流藪澤

長安平康坊妓女所居新進士以紅牋名紙遊其中時謂此坊為風流藪澤 同上

筆頭生花

李太白少夢筆頭生花後天才贍逸名聞天下

百寶欄

上賜國忠木芍藥國忠以百寶為欄 開元遺事

吸花露

貴妃每宿酒初消多苦肺熱凌晨傍花枝口吸

花露潤肺 同上

含玉嚙津

貴妃素有肉體苦熱肺渴每曰含一玉魚藉其

漁津沃肺 同上

夜明枕

魏國夫人有夜明枕光照一室不假燈燭 同上

粲花

粲花

李白與人談論皆成句讀如春葩麗藻粲於齒
牙時號李白梨花之論同上

二鶻擲卵

嘉陵江上見二鶻擲卵相上下以接之蓋習其
飛也其胎教之意乎又翅羽未成躍出巢穴往
往隨崖而死其天性俊勇是亦躁進之類

山鷄自愛

山鷄自愛其色終日映水自眩則溺死

天心月脇

皇甫湜稱愈文曰穿天心出月脇

茗戰

建人謂閩茶為茗戰

金廩銀廩

天子北征曹奴之人觴天子于泮水之上賜金
鹿銀廩今有地上得銀狔金狗之類皆古賂夷
狄奇貨穆天子傳

溫柔鄉

成帝謂合德為溫柔鄉曰吾老是鄉矣不能效
武帝求白雲鄉也樊嬖賀曰陛下真得仙者合
德號為媵好趙六外傳

六甲行厨

左慈明六甲能役鬼神坐致行厨葛洪傳

老子僕徐甲

老子西度關關令尹喜知其非常人從之問道老子大驚舌聃然故號老聃老子耳有三漏手握十文其僕徐甲約日直百錢自隨二百年計欠七百二十萬錢甲詣關令索所欠令問老子對曰甲父應死吾以太玄清生符救之得至今日使甲張口向地符出丹書文字如新甲立成一聚枯骨令知老子神異叩頭請命復以符投

骨上甲乃復生

龍牀

韓志和有道術憲宗時獻一龍牀坐則鱗鬣爪角皆動又於御前以蠅虎子數十令分隊舞梁州曲皆中音節沈玠傳

九色鳳鸞

東方朔游房林之野獲九色鳳鸞洞冥記

懷夢草

鍾火山有香草武帝思李夫人東方朔獻帝懷之即夢見名懷夢草洞冥記

青鸛

羽山之北有鳥曰青鸛聲如鐘磬世語曰青鸛
鳴時太平 拾遺記

寶井

范蠡牧四方難得之貨或藏之井輒謂之寶井
麗色溢於閨房謂之游宮 拾遺記

瓊厨金穴

光武皇后弟郭况家工冶之聲不絕人謂之郭
氏之室不雨而雷東京謂况家為瓊厨金穴

流香渠

靈帝起裸游館千間渠水遶砌蓮大如蓋長一
丈其葉夜舒晝卷名夜舒荷宮人靚粧解上衣
著內服或共裸浴西域貢茵墀香煮湯餘汁入
渠號流香渠

書倉

曹曾積石為倉以藏書名曹氏書倉

如願

有商人過清湖見清湖君君問所需商曰但乞
如願君許之果得一婢如願即其名也商有所
求悉能致之後因正旦如願晚起商人撻之走

入糞壤中不見今人正旦以細繩繫綿人投糞

掃中云乞如願

金薤玉膾

吳都獻松江鱸魚煬帝曰所謂金薤玉膾東南

佳味也

南部烟
花記

閃電窓

帝觀書處窓戶玲瓏相望金鋪玉觀輝映溢目

號為閃電窓

同上

雲仙雜記卷之十





